

**KOROXI**  
**Pauru Nymeroypyry Koroxi pōkō**  
**Neneryme**  
**Colossenses**  
**Ekarotopo**

Pata Koroxi kynexine Azia po, seroae Turukia nonory po. Morotōkō Jezu poetoryme toehse kynexine Epapura namorepatopōpyry etaryke tyya xine omi kurā poko Jezu Kyrixtu poko (Koroxi 1.7; 4.12).

Sero pape tymerose Pauru a āpuruhpyry tao tahtao Roma po (Koroxi 4.3,10,18). Mame Pauru tuaro toehse ajohpe amorepatōkō poko. Azahkuru Jezu poetory tō amorepary se toh kynexine (Koroxi 2.8,16-23). Naeroro tynmerohpyry sero taropose eya Jezu poetory tō Koroxi pōkō neneryme, tuaro toto ehtohme, zae Jezu ehtoh poko, Epapura namorepatopōpyry omipona toto ehtohme ropa. Ynara tamorepase eya: Jezu Kyrixtu rokē kypynanohtorỹko mana; ynoro rokē kyyrypyrykō korokāko mana; enetuputyryke kyya xine Kuesēkōme ipoetoryme exīko sytatose. Kyrixtu maro sero nono tyrise Ritonōpo a, Kyrixtu maro sero nono pōkō enehnōko ropa mana tymaro kuehtohkōme. Kyrixtu maro kuahtao xine jūme isene exīko sytatose.

Tynmerohpyry ae toto amorepāko Pauru mana osenekunohpopyra toto ehtohme onekunohtōkomo a. Ritonōpome nymyry

Jezu mana, sero ekarōko mana. Naeroro tomeseke sehtone ajohpe exiketō omipona pyra kuehtohkōme.

### **Sero pape ao**

Osekarotopo 1.1-2

Aotururu Ritonōpo a Koroxi pōkō poko 1.3-14

Omi kurā Jezu Kyrixtu poko 1.15–3.4

Jezu maro ahtao tyrisenā samo 3.5–4.6

Aosekazumatopo, kure toto ripotoh roropa 4.7-18

### *Pauru nymerohpyry Koroxi pōkō neneryme*

<sup>1</sup> Ynymerohpyry moro onenerykōme. Ywy ase Pauru.

Ritonōpo nymenekahpyryme ase, Jezu Kyrixtu poko imehnō amorepaneme. Taro Timoteu nase ymaro. Kuakorōkōme ynororo Jezu enetuputyryke eya.

<sup>2</sup> Ritonōpo poetoryme matose, Koroxi pōkomo. Wekyryme matose, Kyrixtu enetuputyryke oya xine. Zae roropa matose, Kyrixtu omipona.

Kure rokē oriporykō se ynanase Ritonōpo a, Kumykomo a, ipoe torētyke pyra oehtohkōme.

### *“Kure mase Papa Kapuaono,” kary poko Ritonōpo a*

<sup>3</sup> Ynara āko tarōkō yna a opoko xine: “Koroxi pōkō Jezu Kyrixtu omipona mana yronymyryme. Ritonōpo poetory pyno roropa mā toto ipunaka,” āko toto yna a.

<sup>4</sup> Naeroro opoko xine yna otururuhtao Ritonōpo maro: “Kure mase Papa Kapuaono,” āko ynanase Jezu Kyrixtu Kuesēkō zummy a.

<sup>5</sup> Moino ro zae omi etapitotopõpyry poe ro oya xine Jezu Kyrixtu poko, imeĩpo Ritonõpo maro kuexirykõ poko metatose. Imaro oehtohkõ momohnõko matose. “Ymaro exĩko matose,” katopõpyry Ritonõpo a onytyromara mana. Naeroro ipoetory pyno matose. Oesẽkõme Jezu enetupuhnõko matose, enara.

<sup>6</sup> Kure kyritorỹko Ritonõpo mana. Kure imehnõ rĩko roropa mana. Morara kary totase oya xine. Morara kary etaryke oya xine zae aehtoh waro matose. Imehnõ amorepãko matose emero pata tõ poro. Morarame õmirykõ etaryke tyya xine asã xine Ritonõpo enetupuhnõko mã toto. Kure Ritonõpo orirykõ enetupuhtoh sã oya xine enetupuhnõko mã toto. Kure toto rĩko Ritonõpo mana. Imaro toehtohkõ momohnõko roropa mã toto.

<sup>7</sup> Erapura kynexine ãmorepanekomo, kure Ritonõpo orirykõ poko. Mokyro pyno ynanase yronomyryme. Jezu Kyrixtu poetoryme nymyry ynororo. Zae ãmorepatorỹko mana Kyrixtu poko. Ækorehmatorỹko roropa mana yna esahpyo.

<sup>8</sup> Yna zuruase mokyro opoko xine: “Ritonõpo Zuzenu poe imehnõ pyno mã toto yronomyryme,” tykase ynororo opoko xine.

<sup>9</sup> Naeroro mokyro omiry totase yna a exiryke oturukehpyra ynanase opoko xine Ritonõpo netaryme: “Koroxi põkõ akorehmako Papa typoko xine õsenetupuhtoh waro toto ehtohme. Zae ehtoh poko tuaro tyriko toto popyra ehtoh poko pyra toto ehtohme. Ouzenu a toto amorepapoko Papa,” ãko ase Ritonõpo a.

<sup>10</sup> Mame Ritonõpo poe zae ehtoh waro awahtao xine aomipona exĩko matose. Ritonõpo zamaro

matose exīko. Kure rokē imehnō rīko roropa matose, pohto rokē pyra. Mame Ritonōpo waro-hxo exīko matose.

<sup>11</sup> Ynara āko ynanase Ritonōpo a: “Papa Kapuaono emero motye orēpyra mase. Emero omiry motye ōmiry kure mana. Naeroro Koroxi pōkomo a ajamitunuru ekarōko mase jamihme toto ehtohme, penekehpyra roropa toto ehtohme opoko, tākye toto ehtohme toetuarimarykohtao ro,” āko ynanase.

<sup>12</sup> Saerekane esēme Ritonōpo mana. Zae exiketō esēme roropa mana. Ipoetory tō roropa zae mana. Tynekarory kurā kurākāko Ritonōpo mana ekarotohme typoetory tomo a. Moro eraximāko sytatose. Naeroro tākye ehtoko. “Kure mase Papa,” kahtoko. Tukurākase matose Ritonōpo a ty-marō oehtohkōme, imehnō Jezu poetory tō maro, tuisame exikety Jezu tooehse ropa ahtao.

<sup>13</sup> Tyyrypyrykō poko exiketō esēme joroko tamuru mana. Ipoetory tō iiryryryme mana. Tyyrypyhpyke sexiataose roropa. Joroko tamuru omipona sexiataose. Yrome kypynanopyatose ropa Ritonōpo, Tumūkuru poetoryme kuehtohkōme. Tumūkuru pyno ipunaka Ritonōpo mana.

<sup>14</sup> Eya tymyhpokase ropa sã sytatose joroko tamuru poetoryme pyra kuehtohkōme. Kyyrypyrykō topehmase eya toorikyry ke kymyakākōme. Kyyrypyrykō tykorokase eya mana zae kuehtohkōme.

*Jezu Kyrixtu ehtoh poko, inyrihpyry poko, enara*

<sup>15</sup> Ritonōpo osenepyra mana. Morara exiryke Tumūkuru tonehpose eya sero nono pona zuaro

kuehtohkōme. Isã Imūkuru mana ipunaka. Apitoryme tonuruse ynororo Ritonōpo mūkurume. Eya emero tyripose Ritonōpo a. Tynyrityã motye kure ynororo Ritonōpo mūkurume toexiryke.

<sup>16</sup> Emero tyrise eya Tummy omi poe, kapuaōkō tyrise eya, xixi, xirikuato tōkehko. Nono pōkō roropa tyrise eya Tummy jamitunuru ke, senohne otyro tōkehko. Osenehnō tyrise roropa eya, joroko tō tuisary, ahno tuisary, pata esã roropa, kutuisarykō roropa, kowenu tō roropa, enara. Emero tyrise eya Kyrixtu omipona ehtohme emero porehme.

<sup>17</sup> Sero pōkō pyra ro ahtao Kyrixtu nae ro ehse. Morara exiryke Jezu poe toehse kehko. Jezu hnao kymarokō pyra exiry. Mame Jezu poe ro senohne enahpyra mana.

<sup>18</sup> Kupuhpyrykōme sã Jezu mana Kuesēkōme exiryke. Zokome sã sytatose ipoetoryme kuahtao xine. Jezu poe isene toehse sytatose. Ritonōpo mūkuru imehxo mana. Tōsemāse ropa ynororo toorihxīpo. Tōsemākapose ropa Ritonōpo a emero motye Jezu ehtohme. Morara exiryke toorihse kuahtao xine ēsemānōko ropa sytatose kure Ritonōpo ritohme jūme.

<sup>19</sup> Tamoreme Tumūkuru poko Ritonōpo tōsenetupuhse: “Umūkuru tuisamehxo tyrīko ase ysamo,” tykase Ritonōpo tyya rokene. Naeroro oxisã mã toto, Ritonōpo nymyryme Imūkuru exiryke.

<sup>20</sup> Ritonōpo zehno sero pōkō kynexine iirypyryme toehse toexirykōke. Toto zehno toehse Ritonōpo roropa. Naeroro ynara tōsenetupuhse Ritonōpo: “Umūkuru emero kurākatōme tyrīko

ase oxiekyryme sã toto ehtohme ymaro,” tykase. Mame oxiehno pyra tyripose ropa toto eya tyehno pyra roropa, Jezu exixihmatopõpyry pokoino wewe pokona. Mame toto zehno pyra toehse Ritonõpo Jezu orihtopõpyry ke, nono põkomo, kapuaõkomo, enara.

<sup>21</sup> Amarokõ roropa Ritonõpo epeme pyra mexiatose. Ise pyra mexiatose ipunaka, oorypyrykõ pokoino. Oorypyrykomo a rokẽ tuaro mexiatose roropa.

<sup>22</sup> Yrome seromaroro Tumũkuru orihtopõpyry pokoino õsenetupuhtokõ tyrisenã sã tyrise ropa Ritonõpo a typyno oehtokõme, tymaro oehtokõme roropa, kure oehtokõme iirypyryme pyra, zae rokẽ oehtokõme, enara.

<sup>23</sup> Naeroro ãmorepatopõpyrykõ onurumekara ehtoko. Orẽpyra ehtoko Kuesẽkõ Jezu enetuputyry poko oya xine. Penekehpyra ehtoko ipoko. Osenekunohpopyra ehtoko ajoajohpãkõ omiry etaryhtao oya xine. Ritonõpo maro oehtokõ momohnõko matose oesẽkõme tonetupuhse oya xine exiryke. Omi kurã etaryke oya xine menetuputyatose. Pake moro omi kurã poko kuamorepatosene. Seromaroro moro omi kurã poko imehnõ amorepãko tuhkãkõ mana emero pata tõ poro.

*Pauru erohtopõpyry Jezu poetory tõ akorehmary poko*

<sup>24</sup> Tãkye ase jetuarimary poko ãkorehmatohkõme. Kyrixtu toetuarimase typoetory tõ kurãkatohme tyya, kukurãkatohkõme. Naeroro Kyrixtu

akorehmāko sã ase jetuarimary ke ipoetory tō kurākary poko.

<sup>25</sup> Ritonōpo poe Jezu enetupuhnanō akorehmaneme ase. Eya tyrohmanohpose ywy ākorehmatohkōme. “Jomiry kurā poko imehnō amorepako emero pata tō poro,” tykase ya.

<sup>26</sup> Pake Ritonōpo osenetupuhtopōpyry waro pyra sero pōkō nexiase. Tuenikaroro rokē toh nexiase Ritonōpo osenetupuhtopōpyry poko. Yrome seromaroro tōsenetupuhtopōpyry tokarose rahkene tonetupuhnanomo a.

<sup>27</sup> Ynara tōsenetupuhse Ritonōpo: “Juteutōkarame awahtao xine ro Kyrixtu amaro xine mana. Morara exiryke imaro tuisame exīko matose,” tykase. Moro poko onetapitopyra sexiataose aporo tokare pyra exiryke. Seromaroro moro omi kurā ekarory se mana emero netaryme.

<sup>28</sup> Morara exiryke Kyrixtu poko oturukehpyra ynanase emero pata tō po. Morotōkō amorepāko ynanase. “Tomeseke ehtoko Jezu enetuputyry poko ekurehpyra oehtohkōme. Tokurehse awahtao xine apotoimo htaka ytōko matose,” āko ynanase eya xine. Tuaro exiketō sã toto amorepāko ynanase Kyrixtu poko, ynara kary se yna exiryke Ritonōpo a: “Moxiā orēpyra mā toto Jezu pyno toexirykō poko, aomipona toexirykō poko, enara, Kyrixtu maro toehse toexirykōke,” kary se ynanase Ritonōpo a.

<sup>29</sup> Naeroro erohnōko ase yronymyryme. Etu-arimāko ase roropa repe. Yrome tyjमितunuru ekarōko Kyrixtu ya mana tōmipona jehtohme. Emero motye orēpyra Kyrixtu omiry mana. Mame tyjमितunuru ekaroryke ya imehnō amorepāko

ase.

## 2

<sup>1</sup> Jerohtopõpyry poko oururukõ se ase zuaro oehtohkõme. Yronymyryme erokuase ãkorehmatohkõme, Raotisea põkõ roropa akorehmatohme, imehnõ roropa juaro pyra exiketõ akorehmatohme roropa.

<sup>2</sup> Yronymyryme toerohse ywy toto jamihtanohtohme, Jezu omipona toto ehtohme. Imehnõ Jezu poetory pyno toto ehtohme roropa. Itamurumehxo zae omi waro toto exiry se exiase orẽpyra toto ehtohme Jezu enetuputyry poko eya xine. Morara ahtao: “Otarãme enetupuhnõko ase,” kara exiiko mã toto. “Otarãme aomipona se pyra ase,” kara roropa exiiko mã toto. Mame Ritonõpo osenetupuhtopõpyry waro exiiko mã toto, Kyrixtu nymyry waro exiiko roropa mã toto. Ritonõpo namoreparý emero pyra jarao kyya xine mana.

<sup>3</sup> Kyrixtu maro kuahtao xine Ritonõpo namorepatoh warohxo exiiko sytatose. Tupimãkõ waro exiiko sytatose. Ritonõpo osenetupuhtoh enetupuhnõko sytatose, zae ehtoh enetupuhnõko sytatose, zae pyra ehtoh roropa enetupuhnõko sytatose.

<sup>4</sup> Naeroro etatoko pahne, osenekunohpopyra ehtoko ajohpãkomo a. Otarãme imehnomo a mokaro omiry kure repe, yrome zae pyra mã toto. Ajohpe mã toto oenekunopyrykõ se toexirykõke.

<sup>5</sup> Amaro xine pyra ase taro, yrome opoko xine osenetupuhnõko ase. Tãkye ase roropa opoko xine, orẽpyra oexirykõke. Atakorehmãko matose



orēpyrahxo Kyrixtu enetuputyry poko oya xine. Moro poko tākye kuhse ase.

*Kyrixtu maro kuexirykō poko*

<sup>6</sup> Jezu Kyrixtu tonetupuhse oya xine oesēkōme. Naeroro onytyromara ehtoko. Aomipona rokē ehtoko, oesēkōme tonetupuhse oya xine exiryke.

<sup>7</sup> Wewe tymise exikety sã ehtoko. Orēpyra Kyrixtu enetuputyryke oya xine orēpyra aomipona exīko matose. Itamurumehxo enetupuhtoko. Āmorepatopōpyrykō omipona ehtoko. Mame: “Kure mase Papa. Yna pyno mase ipunaka,” kakehpyra ehtoko Ritonōpo a.

<sup>8</sup> Tomeseke ehtoko typoetoryme oripopyra xine imehnō ehtohme. Otarāme okuhtoryko mã toto ahno namorepatopōpyry ke oenekunohtohkōme repe. Kytamurukō omihpyry poko āmoreparykō se mã toto Ritonōpo se pyra aexityã omihpyry poko roropa repe. Toiparo rokē āmorepatorỹko mã toto. Aomirykō omipona pyra ehtoko Kyrixtu poe pyra toto exiryke.

<sup>9</sup> Ritonōpo, Kyrixtu maro oxisã mã toto. Kyrixtu tonuruse ahnome kuamorepatohkōme Ritonōpo poko, aomiry poko, enara. Naeroro Kyrixtu eneryke kyya xine Ritonōpo waro sytatose.

<sup>10</sup> Amarakō roropa Kyrixtu omipona awahtao xine Ritonōpo jamitunuru nae matose. Emero motye tuisamehxo Kyrixtu mana. Ritonōpo nenyohyã esēme mana, joroko tamuru omipona exiketō esēme roropa mana.

<sup>11</sup> Naeroro Kyrixtu a tyjamitunuru tokarose oya xine oorypyrykō poko pyra oehtohkōme, tonetupuhse oya xine exiryke. Tyrisenã sã oriatose

opũkõ sahkaryke pyra. Õsenetupuhtohkõ tyrisenã sã tyrise exiryke eya oorypyrykõ jamitunuru tonahkapose eya rahkene.

<sup>12</sup> Tõpurihkase awahtao xine Kyrixtu omi poe õsenetupuhtohkõ xihpyry tonahkase, oorihtohkõ samo. Pake oehtopõpyrykõ tonẽse sã mana aorihtyã ekepyry zonẽtopõpyry samo. Mame Kyrixtu ãsemãkapory ropa sã Ritonõpo a moro sã õsenetupuhtohkõ tyrisenã sã tyrise ropa Ritonõpo a. Tyrisenã sã matose Ritonõpo jamitunuru enetuputyryke oya xine.

<sup>13</sup> Osemazuhme toorihse sã mexiatose. Ritonõpo poko pyra mexiatose ipunaka tyyrypyhpyke oexirykõke, Ritonõpo nymeropohpyry omipona pyra oexirykõke roropa juteutõkaramẽ oexirykõke. Yrome seromaroro õsenetupuhtohkõ tyrisenã sã tyrise ropa Ritonõpo a. Tyrisenã sã matose. Kyyrypyrykõ tykorokase ropa Ritonõpo a emero porehme.

<sup>14</sup> Kuamoreme xine Ritonõpo nymeropohpyry omipona exisaromepyra sexiataose ipunaka. Kyyrypyrykõ tymerose sã monexiano Ritonõpo nymeropohpyry maro. Yrome morohne topehmase Jezu a emero porehme toxixihmase ahtao wewe pokona kymyakãkõme. Kyyrypyrykõ tykorokase eya rahkene.

<sup>15</sup> Morararo toorikyry ke wewe pokona joroko tamuru jamitunuru tonahkapose eya, tyzehnotokõ esẽ jamitunuru tonahkapose, tuisa tõ jamitunuru roropa tonahkapose eya, enara. Jarao typoremãkapose toto eya imehnõ neneryme. Mame tõmipona tyrise toto eya typoremãkapose toto tyya exiryke emero neneryme.

16 Morara exiryke imehnõ nyripotoh onymoipyra ehtoko ynara karyhtao oya xine: “Mokarohne onõpyra ehtoko te, senohne onẽpyra ehtoko, sero ãmepyyry ae erohpyra ehtoko, Oseahmatoh Nuno Kasenato ae, oserematoh ae roropa,” karyhtao.

17 Morohne poko sexiataose Kyrixtu oehpyra ahtao ro. Yrome morohne ekuhtoh sã rokẽ kynexine imeĩpo ehtoh poko enetupuhpotohme rokene. Seromaroro Kyrixtu tooehse exiryke morohne poko se pyra toehse sytatose. Kyrixtu omipona se rokẽ sytatose toehse.

18 Ajohpe exiketõ omiry onetara ehtoko ynara karyhtao eya xine: “Popyra matose yna sã pyra oexirykõke,” karyhtao. Morara kananõ onetara ehtoko. Ynara ãko roropa mã toto otarame oya xine: “Omotye xine ase. Ritonõpo poe osenetyase,” ãko. “Tõsenepose Ritonõpo nenyokyhpyry ya. Inenyoytyã poetoryme rokẽ sytatose. Seahmatone toto,” ãko roropa mã toto ajohpe rokene. Morara kananõ imehnõ motye osekarõko toh mã repe, tuisamehxo osekarõko roropa toh mã repe. Ajohpe rokẽ mã toto. Tamoreme rokẽ osetupuhnõko mã toto.

19 Yrome Kyrixtu Kuesẽkõ enetuputyry turumekase ropa eya xine azahkuru toexirykõke. Yrome kupuhpyrykõme sã Kyrixtu mana Kuesẽkõme exiryke. Zokome sã sytatose ipoetoryme kuexirykõke. Kuokokõ wãtanohpõko Ritonõpo mana, kyzehpyrykõ maro, kymitykõ maro. Moro saaro kuokokõ wãtanohpory saaro kuakorehmatorỹko Ritonõpo mana orẽpyra kuehtokõme tõmipona, tyrisenã sã

kuosenetupuhtohkō ehtohme roropa.

*Kyrixtu maro kuosenetupuhtohkō tyrisenā samō*

<sup>20</sup> Kyrixtu poe kuosenetupuhtohkō xihpyry tonahse mana aorihtyā samo. Tyjमितunuru tokarose roropa kyya xine Ritonōpo a iirypyrymākō esē tō omiry poko penetara oehtohkōme, joroko tamuru omipona exiketō omiry poko penetara roropa oehtohkōme. Morara exiryke iirypyrymākō esē tō omiry poko penetara ehtoko.

<sup>21</sup> Ynara karyhtao eya xine: “Senohne poko pyra ehtoko! Mekarohne onōpyra ehtoko. Morohne anapoipyra ehtoko,” karyhtao eya xine, toto omipona pyra ehtoko.

<sup>22</sup> Morohne enahketyme mā kehko. Axītao rokē mā kehko emero porehme. Morohne ahno omiry me rokē mana, ahno namorepatopōpyry me rokē roropa mana.

<sup>23</sup> “Tuarohxo mokaro,” āko imehnō mā repe. Yrome Ritonōpo nenyohityā ke Ritonōpo myakamāko mā toto. “Kure mase,” kamexipōko mā toto Ritonōpo nenyohityamo a. Ynara āko roropa mā toto: “Ime pyra kuexirykōke oturusaromepyra sytatose Ritonōpo a. Inenyohityamo a rokē soturutone,” āko mā toto ajohpe rokene. Mame tokokō ryhmāko roropa mā toto, yrome typenetatohkō onytyromara mā toto.

### 3

<sup>1</sup> Tōsemākapose ropa exiketō sā matose Kyrixtu omipona oexirykōke. Naeroro Ritonōpo nekarory

poko openetatoko. Kyrixtu poko openetatoko. Tummy maro Kyrixtu typorohse mana, Tummy saaro tuisame toexiryke.

<sup>2</sup> Naeroro sero pōkō penetatoh poko osenetupuhpyra ehtoko. Kyrixtu osenetupuhtoh sã osenetupuhtoko.

<sup>3</sup> Ritonōpo maro Kyrixtu oxisã osenetupuhnōko mã toto. Seromaroro toto osenetupuhtoh saaro osenetupuhnōko matose Kyrixtu omipona oexirykōke. Moro jarao pyra onenetupuhpynomo a, tonēse sã eya xine mana.

<sup>4</sup> Ōsenetupuhtohkō tyrisenã sã mana Kyrixtu omipona oexirykōke. Orihpỹme exīko matose Kyrixtu maro. Mame aepyry ropa ahtao, imaro matose oehnōko. Imaro tuisame exīko matose.

### *Oehtopōpyrykō tyrisenã samo*

<sup>5</sup> Naeroro oorypyrykō poko pyra ehtoko. Openetatohkō poko pyra ehtoko roropa aorihtyã samo. Imehnō nohpo poko pyra ehtoko. Atahmākara ehtoko nohpo poko ehtoh poko. Imehnō poko penetara ehtoko. Nohpo tomo, orutua kō poko pyra ehtoko roropa. Iirypyryme imehnō riry se pyra ehtoko. Toto poremākapory se pyra ehtoko. Omipona xine xihpyry toto onyripyra ehtoko. Oyamene se xine pyra ehtoko. Kyyamene se kuexirykō xihpyryme Ritonōpo a mana. Ritonōpo myakamāko sã matose openetatohkō ke oyamene se xine awahtao xine.

<sup>6</sup> Naeroro tōmipona pyra exiketō zehno exīko Ritonōpo mana. Toto wānohnōko mana.

7 Amarokõ roropa osepeme mexiatose, iirypyrymãkõ maro. Morara awahtao xine mokaro penetatoh poko openetatose roropa.

8 Yrome seromaroro oorypyrykõ irumekatoko. Imehnõ zehno pyra ehtoko. Imehnõ orutua maro oxipoko pyra ehtoko. Ajoajohpe pyra ehtoko roropa. Imehnõ oneunohpyra ehtoko. Omi xihpyry poko pyra ehtoko ipunaka.

9 Kyrixtu tonetupuhse oya xine ahtao tyrisenã sã õsenetupuhtohkõ exiiko ropa mana. Iirypyryme oehtopõpyrykõ turumekase oya xine. Naeroro imehnõ onenekunohpyra ehtoko.

10 Tyrisenã sã õsenetupuhtohkõ rïko Ritonõpo mana aomipona awahtao xine. Tõsenetupuhtoh sã kuosenetupuhtohkõ rïko Ritonõpo mana. Imeïpo toehtoh poko tuarohxo kyritorykõ Ritonõpo mana tysã kuehtohkõme, tuaro roropa kuehtohkõme.

11 Kuosenetupuhtohkõ tyrisenã sã toehse ahtao imehnõ eneryke kyya xine ynara kara sytatose, juteu tõ mokaro, kara sytatose. Juteutõkara mokaro, kara roropa sytatose. Mokaro isahkatyãme mã toto, kara sytatose. Onysahkapỹ mokaro, kara roropa sytatose. Atamorepahnõ mokaro, kara sytatose. Ituakyry mokaro, kara roropa sytatose. Imehnõ namoto tõ mokaro, kara sytatose. Tamoreme xine erohketõ mokaro, kara roropa sytatose. Kyrixtu omipona mã toto. Enetupuhnõko mã toto, ãko rokẽ sytatose imehnõ poko.

12 Õsenetupuhtohkõ tukurãkase Ritonõpo a tõmipona toehse oexirykõke. Opyno xine itamurume kynexine omenekatone roropa typoenõme oehtohkõme. Oorypyrykõ tykorokase

mana. Naeroro imehnō pyno ehtoko. Kure toto riry poko osenetupuhtoko. “Imehnō motye ase kure,” kara ehtoko. Typoenō pyno nohpo ehtoh sã tomeseke ehtoko imehnō maro. Penekehpyra ehtoko roropa imehnō kure ehtoh eraximary poko oya xine.

<sup>13</sup> Imehnō akorehmatoko, zae toto ehtohme. Imehnō rypyry ikorokapotoko Ritonōpo a. Osenetupuhpyra ehtoko popyra oritopōpyrykō poko eya xine. Oorypyrykō korokatotōpyry sã Kuesēkomo a toto rypyry ikorokapotoko roropa.

<sup>14</sup> Morara awahtao xine zae matose. Morara awahtao xine imehnō pyno ehtoko roropa. Toto pyno awahtao xine atapiakara matose, otumoxike pyra roropa matose. Kyrixtu poe osenetupuhnōko sytatose zae ehtoh poko. Naeroro atapiakara sytatose.

<sup>15</sup> Kure rokē imehnō tyritoko. Torētyke pyra matose exīko Kyrixtu poe. Toahmase matose Ritonōpo a torētyke pyra oehtohkōme, oximaro oehtohkōme toiro zoko samo. Naeroro, “Kure mase,” kakehpyra ehtoko Ritonōpo a.

<sup>16</sup> Kokoro rokē Kyrixtu omipona rokē ehtoko ipunaka. Ipoko osenetupuhtoko okurohtao xine. Zae imehnō amorepatoko Jezu Kyrixtu poko. Zae ehtoh poko ituarōtanohpotoko toto. Oeremiatoko ipoko. “Emero motye tuisame mase Jezu,” kary se awahtao xine: “Omoro rokē mase yna esēme Jezu,” kary se roropa awahtao xine te, tãkye awahtao xine okurākatopōpyrykō poko, morohne poko oeremiatoko Ritonōpo netaryme. “Kure mase,” kakehpyra ehtoko roropa okurohtao xine.

<sup>17</sup> Emero rokē ahtao Kuesēkō Jezu omipona

ehtoko. Emero poko oturutoko imaro. Imehnõ maro õtururukohtao oturutoko Jezu netaryme samo. TYPYNANOHSE OEXIRYKÕKE Jezu a: “Kure mase, Ritonõpo,” kahtoko Kumykõ Ritonõpo a.

*Jezu poetory zae ehtoh poko imehnõ maro*

<sup>18</sup> Nohpo tomo, oniokõ omipona ehtoko. Jezu poetoryme oexirykõke zae matose oniokõ omipona awahtao xine.

<sup>19</sup> Orutua komo, opyxiäkõ pyno ehtoko. Tohne pyra ehtoko toto maro. Opore toto onurupyra ehtoko.

<sup>20</sup> Poetohti, Jezu poetoryme oexirykõke omykõ omipona ehtoko. Asakõ omipona ehtoko roropa. Morara awahtao xine Kuesëkõ zamaro matose.

<sup>21</sup> Typoenõke exiketomo, opoenõkõ anaosanumanohpopyra ehtoko ozehno xine pyra toto ehtohme, toto onyporemãkapopyra roropa oehtohkõme.

<sup>22</sup> Tosëke exiketomo, oesëkõ omipona ehtoko toto neneryme rokë pyra. Kure oekarotohkõme rokë pyra toto omipona ehtoko. Onekunohto pyra roropa ehtoko, Kyrixtu omipona se oexirykõke.

<sup>23</sup> Mame oerokurukõ zuno pyra ehtoko. Akĩme pyra ehtoko roropa. Sero põ poetoryme rokë pyra matose erohnõko. Kuesëkõ omi poe roropa matose erohnõko.

<sup>24</sup> Kyrixtu Kuesëkõme nymyry mana. Aomipona erohnõko sytatose. Kuesëkõ kuepehmatorÿko mana. Zae rokë kuahtao xine zae rokë kuepehmatorÿko mana.

<sup>25</sup> Yrome zae pyra toerohse kuahtao xine, moro sã kuepehmatorÿko roropa Ritonõpo mana,



kyyrypyrykõ epehpyryme, zae Ritonõpo exiryke kypoko xine.

## 4

<sup>1</sup> Typoetokamo, zae ehtoko opoetory tomo a. Kure rokẽ tyritoko toto. Tosẽke roropa matose kapu ao. Moro poko wenikehpyra ehtoko.

### *Amorepatyã poko*

<sup>2</sup> Oturukehpyra ehtoko Ritonõpo a. Tuarõ ehtoko õtururukohtao, “Kure mase,” kakehpyra ehtoko Ritonõpo a.

<sup>3</sup> Mame õtururukohtao Ritonõpo a, yna poko oturutoko: “Tupime pyra Pauru tõ otururu tyriko imehnõ amorepatohme õmiry poko, Kyrixtu orih-topõpyry poko yna myakãme,” kahtoko. Morohne poko imehnõ zururuke ya ãpuruhpyry tao ase sero-maroro.

<sup>4</sup> Yrome zae ro ya mana Kyrixtu poko imehnõ amorepary ya. Naeroro ynara kahtoko: “Pauru tõ akorehmako Papa, kure imehnõ amorepatohme, õmiry enetupuhtohme eya xine,” kahtoko Ritonõpo a.

<sup>5</sup> Jezu poetory tõ kara maro awahtao xine tuaro ehtoko toto maro, penekkehpyra toto ehtohme. Ekurehpyra ehtoko. Etary se toto ahtao zuruko toto Jezu Kyrixtu poko.

<sup>6</sup> Kure rokẽ oturutoko imehnõ maro zuaro exiketõ samo, oetarykõ poko penekkehpyra toto ehtohme. Mame kure imehnõ ezukuru waro exiiko matose ekaroporyhtao oya xine, Jezu poko onenetupuhpynõ ezukuru waro oehtohkõme roropa.

### *Aosekazumatopõpyry ropa poko*

<sup>7</sup> Yna akorõme Tikiku mana. Yzamaro mana ita-murume. Ýme erohnõko mana yna maro Kuesẽkõ poetoryme. Aytoryhtao oya xine ourutorỹko mana ypoko.

<sup>8</sup> Morara exiryke mokyro aropõko ase oya xine, åtãkyematohkõme yna ehtoh poko oururukõke eya.

<sup>9</sup> Ímaro Onezimu ytõko roropa mana. Jezu poetoryme ynororo zae rõropa ynororo yronymyryme. Yzamaro roropa mana. Oekyrykõme mã ynororo. Oya xine toytose tahtao xine ourutorỹko mã toto, taro yna ehtoh poko, porehme.

<sup>10</sup> Arixtaku taro mana, ymaro ãpuruhpyry tao. “Kure pãna matou?” kary se ynororo oya xine. Maku roropa morararo. Maku Panape akonome mana. Otarãme ytõko roropa mana oenese xine. Ynymerohpyry ipoko mapoiatose. “Toytose oya xine ahtao eahmatoko atapyĩkõ taka aytotohme,” ase, ymeroase onenerykõme.

<sup>11</sup> Jozue roropa: “Kure pãna matou?” kary se oya xine mana. Jozue esety akorõ Juxitume mana. Juteu tõ mokaro oseruao ro erohnõko mã toto ymaro imehnõ amorepary poko Jezu enetuputyry poko, tosẽkõme Ritonõpo enetuputyry poko, enara. Jakorehmaryke eya xine tãkye ase ipunaka.

<sup>12</sup> Epapura roropa: “Kure pãna matou?” kary se oya xine mana. Mokyro oekyrykõme roropa mana. Jezu Kyrixtu omipona exiketyme roropa mana. Oturukehpyra ynororo yronymyryme Ritonõpo a opoko xine Jezu enetuputyry onurumekara oehtohkõme. “Orẽpyra Koroxi põkõ tyriko Papa, tuarohxo toto ehtohme zae ehtoh poko. Õmiry zae ehtoh waro tyriko toto. Õmipona

ipunaka tyriko toto roropa,” āko ynororo Ritonōpo a opoko xine.

<sup>13</sup> Eapura erohtopōpyry ekarōko ase oya xine zuaro jexiryke. Yronymyryme toerohse ākorehmatohkōme, Raotisea pōkō akorehmatohme roropa, Ijerapori pōkō roropa.

<sup>14</sup> Ruka roropa: “Kure pāna matou?” kary se nase oya xine, Temaxi roropa. Opi warōme roropa ynororo Ruka. Yna zamaro ynororo pitiko rokē pyra.

<sup>15</sup> “Kure pāna matou?” kahtoko Jezu poetory tomo a Raotisea po. Morara kahtoko Nīpa a imarōkomo a roropa, Jezu poetory tomo a roropa ōximomyrykohtao itapyĩ tao.

<sup>16</sup> Sero nymerohpyry tonese oya xine ahtao aropoko ropa Jezu poetory tō neneryme Raotisea pona. Morararo nymerohpyry, Raotisea pōkō neneryme isekerematoko roropa taropose ahtao oya xine Raotisea pōkomo a.

<sup>17</sup> Ynara kahtoko Arakipu a: “Oerohtoh onurumekara exiko otyhkary ponāmero oya, Kuesēkō nyrohmanohpotopōpyryme exiryke,” kahtoko.

<sup>18</sup> Jemary ke nymyry sero merōko ase, kure pāna matou? Ýwy ase Pauru. Wenikehpyra ehtoko āpuruhpyry tao jehtoh poko.

Kure rokē oriporykō se ase Ritonōpo a. Enara.

[]  
**Khmer Standard Version of the Holy Bible in  
the Khmer Language of Cambodia**

Copyright © 1997, 2005 The Bible Society in Cambodia

[]

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចម្លង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជ

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.